

आकाशवाणी

पैहले खास-खास खबरां:-

1. पच्छिम बंगाल च विधानसभा चुनाएं दे पैहले गेड़ च 92 इशारिया 7 फीसद मतदान दर्ज कीता गेआ। तमिनाडू च रिकार्ड 85 फीसद थमां मता मतदान होआ।
2. निर्वाचन आयोग नै पच्छिम बंगाल विधानसभा चुना आस्तै मतदान मगरा आहले नमें दिशा-निर्देश जारी कीते न।
3. भारतीय दूतावास नै तेहरान स्थित भारतीय लेई सख्त सलाह जारी करदे होई उनें'गी ब्हाई जां जमीनी रस्तेआ ईरान दी यात्रा नैई करने लेई आखेआ।
4. अमरीका दे राष्ट्रपति डोनाल्ड ट्रम्प होरें आखेआ जे कल रातीं व्हाइट हाऊस च होई दी गल्लबात मगरा इज़रायल ते लेबनान 3 हफ्ते आस्तै संघर्ष विराम बदाने पर सहमत होई गे न।
5. ते आई.पी.एल क्रिकेट च कल रातीं मुम्बई दे वानखड़े स्टेडियम च खेड्डे गेदे मैच च चेन्नेई सुपर किंगस नै मुम्बई इंडियन्स गी 103 रन्ज कन्नै हराया।

<><><><><><>

Assembly Polls

निर्वाचन आयोग नै आखेआ जे पच्छिम बंगाल च पैहले गेड़ च 92 इशारिया 7 फीसद मतदान होआ ऐ जेड़ा आजादी दे मगरा थवां अजे तगर दा सब्बनें थवां मता मतदान फीसद ऐ। आयोग मूजब तमिलनाडू च कल 85 फीसद रिकार्ड मतदान दर्ज कीता गेआ। पच्छिम बंगाल च करीबन 91 फीसद मतदाताएं- 92 इशारिया 6-9 फीसद महिलाएं ते 57 फीसद Third Gender मतदाताएं वोट पाने दे अपने अधिकार दा

इस्तेमाल कीता। तमिलनाडू च 83 फीसद मर्द- 86 फीसद महिलाएं ते 60 फीसद Third Gender मतदाताएं वोट पाने आहले अपने अधिकार दा इस्तेमाल कीता। मुख चुनां आयुक्त ज्ञानेश कुमार- चुनां आयुक्त डाक्टर एस.एस. संधु ते डाक्टर विवेक जोशी होरें लाइव वेबकास्टिंग राएं मतदान प्रक्रिया पर नजर रक्खी। दोनैं राज्यें च सारे मतदान केन्द्रें पर एदी बवस्था कीती गेदी ही।

<><><><><><>

EC -Poll

निर्वाचन आयोग नै पच्छिम बंगाल विधानसभा चुनाएं आस्तै मतदान मगरा इक नमां दिशा-निर्देशजारी कीता ऐ। मतदान सम्पन्न होने मगरा निगरानी कैमरा ते वीडियो डेटा गी संभालने दे सख्त दिशा-निर्देश जारी कीते गे न। इन्हें दिशा-निर्देश तैहत मतदान केन्द्र दे कैमरें दा इस्तेमाल कीते गेदे SD कार्ड गी मतदान खत्म होने दे फौरी मगरा नैई कड्डेआ जाई सकदा। इन्हें कैमरें गी सैक्टर अधिकारी दी निगरानी च रखेआ जाना चाईदा। मतदान दल जां बूथ स्तह दे अधिकारी ते होर सारे सदस्य कैमरा उपकरण गी पूरी चाल्ली हटाए जाने तगर मतदान केन्द्र पर मौजूद रहैन।

<><><><><><>

Bihar CM Confidence

बिहार दे मुखमंत्री सम्राट चौधरी होर अज्ज विधान सभा दे विशेष इक रोजा सत्र दौरान विश्वास मत पेश करडन। विधानसभा सचिवालय आसेआ जारी आधिकारिक अधिसूचना मूजब सत्र बड्डलै 11 बजे शुरु होग- इस दौरान मुखमंत्री विश्वास प्रस्ताव

पेश करोग। सारे मंत्रिण ते विधायकें गी उन्दी सरबंधित पार्टियें आसेआ सदन दी कारवाई च मौजूद रौहने दा अनुरोध कीता। सम्राट चौधरी नै 15 अप्रैल गी मुखमंत्रि दे ओहदे दी संगध लैती जेदे मगरा उ'ने विधानसभा च विश्वास मत हासिल करना ऐ।

<><><><><><>

Agri Conf.

राई-बाई ते करसान कल्याण मंत्रालय आसेया अज्ज लखनऊ च उत्तरी क्षेत्र कृषि सम्मेलन दा आयोजन कीता जाहग। केन्द्री राई-बाई मंत्री शिवराज सिंह चौहान होर इस कार्यक्रमै च हिस्सा लैडन। मंत्रालय नै आखेआ ऐ जे एह कार्यक्रम राई-बाई दे खेतर गी नमें बचारें- नमीं तकनीकें ते नमें बजारें कन्नै जोड़ने आला इक बड़ा मंच उपलब्ध करोआग। एह सम्मेलन बक्ख-बक्ख महत्वपूर्ण मामलें दे लोड़चदे हल उपलब्ध करोआने च बड़ा कारी दा साबत होग। इन्दे च नकली कीड़ेमार दोआड़ें ते नकली हैल गी नियंत्रित करने- हैलें दी कालाबजारी गी रोकने- बंड बिक्री आले सरिस्तें च सुधार आहन्ने ते संतुलित इस्तेमाल ज्नेह मामले मुख तौर पर शामिल न।

<><><><><><>

National Panchatiraj Day

पंचैती राज मंत्रालय आसेया अज्ज पंचैती राज सरबन्धी राश्ट्री ध्याड़ा मनाया जा'रदा ऐ। एह ध्याड़ा मुखै च पंचैती राज संस्थानें गी संवैधानिक दर्जा ते कनूनी मान्यता देने सरबन्धी 73में संवैधानिक संशोधन कनून दे लागू होने दे ऐतिहासिक मौके दा चेता करोआंदा ऐ। अज्जै दे इस ध्याड़े दा मुख कार्यक्रम नमीं दिल्ली च आयोजित होग। मंत्रालय मूजब- राश्ट्री सतह दे इस कार्यक्रम दे इक महत्वपूर्ण हिस्से दे तौर पर

प्रधानमंत्री नरेन्द्र मोदी हुंदा इक संदेश बी सनाया जाहग। मंत्रालय नै इब्बी जानकारी दिती ऐ जे प्रधानमंत्री हुंदे इस संदेश गी मुख्य भरै च पंचैती राज संस्थानें ते ग्रामीण मकामी निकायें दे चुने गेदे प्रतिनिधिएं ते होरनें औहदेदारें तगर बी पुजाया जाहग।

<><><><><><>

PM Mann ki Baat

प्रधानमंत्री नरेन्द्र मोदी होर 26 अप्रैल बड़लै 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै अपने विचार सांझे करगंन। हर महीने दे खीरी ऐतवार गी प्रसारत होने आहले इस कार्यक्रम दी एह 133मीं किश्त होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज दी वेबसाईट ते न्यूज ऑन ए.आई.आर mobile app- डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग।

<><><><><><>

Embassy Tehran

तेहरान च स्थित भारत दे राजदूती दफ्तरै भारती नागरिकें गी सख्ती कन्नै सलाह जारी करदे होई आखेआ ऐ जे ओह ब्हाई जां जमीनी रस्तेआ ईरान दी जातरा नैई करन। राजदूती दफ्तरै आखेआ ऐ जे खिते च बनी दी तनोतनी दे चलदे ब्हाई खेतर पर लाई गेदी बंदिशएं ते संचालन सरबन्धी अनिश्चितता करी ईरान औने-जाने आहली डुआरियां लगातार प्रभावत होआ करदियां न। राजदूती दफ्तर नै अपनी सलाह च ईरान च रवा करदे सब्बनें भारती नागरिकें गी इब्बी आखेआ ऐ जे ओह साफरतखानें दे तालमेल कन्नै जिमीं आले तय सीमा-मार्गे राहें तुरत ईरान छोड़ी देन।

<><><><><><>

Trump –Iran War

अमरीका दे राष्ट्रपति डोनाल्ड ट्रम्प होरें आखेआ ऐ जे कल रातीं व्हाई हाऊस च होई दी गल्लबात मगरा इजरायल ते लेबनान 3 हफ्ते आस्तै युद्ध विराम बदाने पर सहमत होई गे न। ट्रम्प होरें ओवल ऑफिस च इजरायल दे वाशिंगटन स्थित राजदूत येचिएल लीटर ते लेबनान दी अमरीका स्थित राजदूत नाडा मोआद दी अमरीकी मध्यस्थता च होई दी दुए दौर दी मेजबानी कीती। ट्रम्प होरें आखेआ जे पिच्छले इक हफ्ते च इजरायल ते लेबनान दे अमरीकी राजदूतें बशकार होई दी एह दुई बैठक सफल रेई ऐ। शुरुआती 10 दिन आहला युद्ध विराम सोमवारें खत्म होने आहला हा। इस्सै दौरान अमरीका दे राष्ट्रपति डोनाल्ड ट्रम्प होरें ईरान खिलाफ संघर्ष च परमाणु हथियार इस्तेमाल करने दी संभावना गी खारिज कीता। उ'नें आखेआ जे परमाणु हथियारें दा इस्तेमाल करने दी इजाजत कुसै गी नैई दिती जाहग।

<><><><><><>

UNGA President- India Visit

संयुक्त राष्ट्र महासभा दी अध्यक्ष एनालेना बेरबॉक होर अगले हफ्ते भारत दा दौरा करडन। इस दौरान ओह बक्ख-बक्ख विशे पर भारतीय अधिकारिएं कन्नै दपक्खी गल्लबात करडन। उन्दी प्रवक्ता मूजब संयुक्त राष्ट्र महासभा दे 80में सत्र दी अध्यक्ष बेरबॉक अगले हफ्ते नमीं दिल्ली ते बीजिंग दी अधिकारिक यात्रा पर जाडन। उ'नें गलाया जे बेरबॉक भारत ते चीन दी सरकारें दे साददे पर यात्रा करा'रदियां न। भारत दौरे दौरान बेरबॉक बक्ख-बक्ख सरकारी अधिकारियें कन्नै दपक्खी बैठक करडन ते

संयुक्त राष्ट्र दे रेजिडेंट कोआर्डिनेटर स्टीफन प्रीसनर हुंदी अगुआई च भारत च संयुक्त राष्ट्र दी कंट्री टीम कन्नै बी मलाटी करडन। संयुक्त राष्ट्र महासभा अध्यक्ष दे तौर पर एह बेरबॉक हुंदी भारत दी पैहली यात्रा ऐ।

<><><><><><>

IPL

आई.पी.एल क्रिकेट च कल रातीं चेन्नेई सुपर किंग्स नै मुम्बई दे वानखेड़े स्टेडियम च खेड्ढे गेदे मैच च मुम्बई इंडियन्स गी 103 रन्ज कन्नै हराया। जित्त आस्तै 208 रन्ज दे लक्ष्य दा पिच्छा करदे होई मुम्बई इंडियन्स 19 ओवर च छड़े 104 रन्ज बनाइयै ऑलआउट होई गई। एदे थवां पैहले-पैहले बल्लेबाजी करदे होई चेन्नेई सुपर किंग्स नै तय 20 ओवरें च 6 विकटें दे नुकसान पर 207 दा बड़डा स्कोर बनाया। चेन्नेई सुपर किंग्स दी तरफा संजू Samson नै 54 गेंदे च शानदार ते नाबाद 101 रन्ज बनाए जिसले कि अकील हुसैनै नै छड़े 17 रन्ज देइए 4 विकट लैते- तिलक वर्मा नै 29 गेंदे पर 37 रन्ज बनाए जिसले के ए.एम. गजनफर ते अश्वनी कुमार नै मुम्बई इंडियन्स आस्तै 2-2 विकट लैते। संजू Samson गी प्लेयर ऑफ द मैच चुनेया गया। अज्ज बेंगलुरु दे एम. चिन्नास्वामी स्टेडियम च रॉयल चैलैन्जर्स बेंगलूरु दा मुकाबला गुजरात टाईटन्स कन्नै होग। एह मैच संजा साइडे 7 बजे खेड्ढेया जाहग।

<><><><><><>

IMD

मौसम विभाग नै दिल्ली- पंजाब-हरियाणा-चंडीगढ़-राजस्थान- मध्य प्रदेश- उत्तर प्रदेश ते विदर्भ च लू चलने दी संभावना जाहिर कीती ऐ। विभाग नै बिहार-केरल-माहे-

झारखंड ते छत्तीसगढ़ च बी लू चलने दा अनुमान जताया ऐ। मौसम विभाग मुजब तटीय आँध्र प्रदेश- तटीय कर्नाटक- गंगा दे मैदानी क्षेत्र- पच्छिम बंगाल- ओडिशा- गुजरात- कोकण- गोवा- तमिलनाडु-पुदुचेरी ते कराईकल च गरम ते गुम्मै आहला मौसम बने दा रहौग। तौआई जम्मू ते कश्मीर- लद्दाख- गिलगित बाल्टिस्तान- मुजफराबाद- पच्छिम बंगाल ते सिक्किम च बिजली ते तेज हवाएं करी बरखा होने दी संभावना ऐ। आंध्र प्रदेश- असम ते मेघालय च बी ऐसी गै स्थिति बनी रौहने दी मेद ऐ।

<><><><><><>